

Mampu elak manipulasi harga pihak tertentu

Langkah pameran harga ubat beri manfaat besar kepada rakyat khususnya B40

Oleh MOHD FAIZUL
HAIKA MAT KHAZI
SHAH ALAM



DR HALIZA

Pelaksanaan Perintah Pemaparan Harga Ubat di kemudahan jagaan kesihatan swasta dan farmasi komuniti seluruh negara mulai 1 Mei lalu mampu mengelak pengguna daripada menjadi mangsa manipulasi harga pihak tertentu.

Pakar Governan Persekitaran dari Fakulti Perubatan dan Sains Kesihatan, Universiti Putra Malaysia (UPM), Profesor Madya Dr Haliza Abdul Rahman berkata, langkah itu memberi manfaat besar kepada rakyat khususnya golongan berpendapatan rendah (B40).

Menurutnya, inisiatif berkenaan membuka ruang kepada pengguna membandingkan harga dan memilih jenama ubat yang bersesuaian dengan kemampuan masing-masing.

"Dengan harga yang dipamerkan, pesakit boleh buat keputusan awal dan tidak perlu tertekan sekiranya bajet tidak mencukupi.

"Bila ada harga, kita boleh pilih jenama berdasarkan harga dan kandungan. Ini memberi kelebihan kepada pengguna," katanya kepada *Sinar Harian*.

Beliau berkata demikian ketika diminta mengulas mengenai dasar baharu kerajaan yang melaksanakan Perintah Kawalan Harga dan Antipencatutan (Penandaan Harga Bagi Ubat) 2025 di bawah Akta Kawalan Harga dan Antipencatutan 2011 (Akta 723).

Dr Haliza berkata, meskipun kebanyakan farmasi sebelum ini sudah memaparkan harga ubat, pelaksanaan menyeluruh ini penting untuk memasti-

SENARAI FASILITI KESIHATAN SWASTA YANG TERLIBAT

- Hospital swasta
- Hospital psikiatri
- Rumah bersalin
- Pusat jagaan ambulatori
- Klinik perubatan swasta
- Klinik pergigian swasta
- Pusat hemodialisis
- Hospis
- Farmasi komuniti
- Pusat jagaan kejururawatan
- Pusat jagaan psikiatri
- Pusat kesihatan mental masyarakat

* Sumber KKM



kan ketelusan di semua premis termasuk klinik swasta dan fasiliti berbayar kerajaan.

"Kadangkala kita tak tahu ubat apa yang diberi dan tidak diberi pilihan. Jika ada dua atau tiga jenama untuk ubat sama dan harganya dipamerkan, kita boleh pilih ikut kemampuan kita," katanya.

Beliau dalam pada itu turut menyuarakan kebimbangan terhadap kemungkinan wujudnya dominasi pasaran oleh pembekal tertentu yang hanya mempromosi produk berharga tinggi.

"Kadangkala ada perjanjian antara pembekal dengan farmasi atau klinik swasta, jadi produk yang murah kurang diberi perhatian. Kalau semua harga dipamerkan, pengguna lebih peka dan pembekal tidak boleh sesuka hati menentukan harga," ujarnya.

Katanya, walaupun pelaksanaan awal mungkin berdepan kekangan, manfaat jangka panjang kepada pengguna jauh lebih besar.